



МОНГОЛ УЛСЫН  
ЭРҮҮЛ МЭНДИЙН САЙДЫН ТУШААЛ

2012 оны 01 сарын 17 өдөр

Дугаар 26

Улаанбаатар хот

Г  
Өрхийн эрүүл мэндийн төвтэй холбоотой  
зарим арга хэмжээний тухай

Эрүүл мэндийн тухай хуулийн 16 дугаар зүйлийн 16.2 дахь заалт, Засгийн газрын 2011 оны “Дүрэм батлах тухай” 364 тоот тогтоолыг үндэслэн ТУШААХ НЬ:

1. “Өрхийн эрүүл мэндийн төвийг сонгон шалгаруулах журам”-ыг нэгдүгээр, “Өрхийн эрүүл мэндийн төвтэй байгуулах гүйцэтгэлийн гэрээний үлгэрчилсэн загвар”-ыг хоёрдугаар, “Гэрээг дүгнэх шалгуур үзүүлэлт”-ийг гуравдугаар хавсралтаар тус тус баталсугай.
2. Гэрээний загварыг үндэслэн орон нутгийн онцлогт тохируулан гэрээ байгуулж ажиллахыг аймаг, дүүргийн Засаг дарга, Аймгийн эрүүл мэндийн газрын дарга, дүүргийн эрүүл мэндийн төвийн дарга нарт даалгасугай.
3. Энэхүү тушаалыг хэрэгжүүлэх ажлыг зохион байгуулж, мэргэжил арга зүйн удирлагаар хангаж ажиллахыг Эмнэлгийн тусlamжийн бодлогын хэрэгжилтийг зохицуулах газар /Д.Гончигсүрэн/-т, тушаалын хэрэгжилтэд хяналт тавьж ажиллахыг Мэдээлэл хяналт, шинжилгээ, үнэлгээний газар /Д.Жаргалсайхан/-т тус тус даалгасугай.



Сайд

С.ЛАМБАА

080090

ӨРХИЙН ЭРҮҮЛ МЭНДИЙН ТӨВИЙГ  
СОНГОН ШАЛГАРУУЛАХ ЖУРАМ

**Нэг. Нийтлэг үндэслэл**

1.1 Энэхүү журам нь хүн амд төрөөс үзүүлэх эрүүл мэндийн тусламж, үйлчилгээг гэрээгээр гүйцэтгэх өрхийн эрүүл мэндийн төвийн багийг (цаашид баг гэх)-ийг сонгон шалгаруулах үйл ажиллагааг зохицуулахад чиглэгдэнэ.

1.2 Засгийн газрын “Дүрэм батлах тухай” 364 тоот тогтоолд заасны дагуу өрхийн эрүүл мэндийн төвтэй гэрээ цуцалсан тохиолдолд дараагийн өрхийн эрүүл мэндийн төвийн сонгон шалгаруулах үйл ажиллагаанд энэхүү журмыг баримтална.

**Хоёр. Сонгон шалгаруулалтад оролцох багт тавигдах шаардлага**

2.1 Сонгон шалгаруулалтад оролцох өрхийн эрүүл мэндийн төвийн баг нь “Нөхөрлөлийн тухай” хуулийн дагуу үүсгэн байгуулагдсан, улсын бүртгэлд бүртгүүлсэн байна.

2.2 Баг нь “Дүрэм батлах тухай” 364 тоот тогтоолд заасан шалгуурыг хангасан хүнийг ахлагчаар томилж, сонгон шалгаруулалтанд оролцно.

2.3 Баг нь “Өрхийн эрүүл мэндийн төв”-ийг хөгжүүлэх дунд хугацааны стратеги төлөвлөгөөтэй байна. Төлөвлөгөөнд доорхи агуулгыг тусгасан байх:

2.3.1 стратегийн зорилго, зорилтыг тодорхойлсон байх,

2.3.2 байгууллагын эрхэм зорилго, стратеги, хүн амын хамрах хүрээ, үйл ажиллагааны зорилтот түвшин, түүнд хүрэх үйл явц, цогц арга хэмжээний талаар тусгах,

2.3.3 үйлчлэх хүрээний хүн амын эрүүл мэндийн байдалд үнэлгээ, дүгнэлт өгч, үйл ажиллагааны хүрэх зорилтот түвшинг тодорхойлсон байх,

2.3.4 үйлчилгээний нэр төрөл, хүртээмж, хүрсэн түвшин, чанарыг сайжруулах, үйлчилгээний чадавхийг дээшлүүлэх арга хэмжээнүүд, тэдгээрийг практикт нэвтрүүлэх чиглэлийн үйл ажиллагааг төлөвлөх,

2.3.5 байгууллагын үйл ажиллагааг маркетинг ба санхүүгийн удирдлага, мэдээллийн технологид суурilan хөтөлж явуулах тогтолцоонд шилжүүлэх арга хэмжээг тусгах,

2.3.6 эрүүл мэндийн тусламж, үйлчилгээний хүртээмж, тасралтгүй байдлыг сайжруулах, нэр төрлийг нэмэгдүүлэх арга замыг тодорхойлсон байх,

- 13
- 2.3.7 төвийн хүний нөөцийг хөгжүүлэх, нийгмийн асуудлыг шийдвэрлэх төлөвлөгөө, хэрэгжүүлэх арга замыг тодорхойлсон байх,
  - 2.3.8 тусlamж, үйлчилгээний чанарын төлөвлөгөө, хөтөлбөрийг боловсруулан, үр дүнг дээшлүүлэх арга замыг тодорхойлсон байх,
  - 2.3.9 өрхийн эрүүл мэндийн төвийн мэдээллийн технологийг боловсронгуй болгох, үйлчилгээний чадавхийг дээшлүүлэх замыг тодорхойлсон байх,
- 2.4 Баг нь “Өрхийн эрүүл мэндийн төвийн бүтэц, үйл ажиллагаа MNS5292” стандартад заасны дагуу тусlamж, үйлчилгээг үзүүлэхэд шаардлагатай хүний нөөцийг бүрдүүлсэн байх,
- 2.5 Багийн эмнэлгийн мэргэжилтнүүд дараах шаардлагыг хангасан байна:
- 2.5.1 Эмч, мэргэжилтнүүд нь “эмчлэх”, “сувилах” үйл ажиллагаа эрхлэх зөвшөөрөлтэй байх,
  - 2.5.2 Нийгмийн ажилтан нь эрүүл мэндийн нийгмийн ажилтны сургалтанд хамрагдсан, дадлага туршлагатай байх,
  - 2.5.3 Багийн гишүүн нь урьд нь гэрээ нь цуцлагдсан өрхийн багийн гишүүн байж болох ба зөрчилгүй ажилласан байх.
- 2.6 Багийн ажиллах дотоод журам, нийт гишүүдийн ажил үүргийн хуваарийг гаргасан байх,
- 2.7 Хууль, мэргэжлийн хяналтын болон татварын байгууллагуудаас тодорхойлолт гаргуулсан байна.

**Гурав. Сонгон шалгаруулалтын зарчим, үйл ажиллагаа**

- 3.1 Аймаг, нийслэлийн Эрүүл мэндийн газар өрхийн эрүүл мэндийн төвийн багийг сонгон шалгаруулах үйл ажиллагааг зохион байгуулна.
- 3.2 Сонгон шалгаруулалт нь ил, тод, нээлттэй, шударга байх зарчмыг баримтална.
- 3.3 Сонгон шалгаруулах үйл ажиллагааг “Төрийн болон орон нутгийн өмчийн хөрөнгөөр бараа, ажил, үйлчилгээ худалдан авах тухай хууль”-ийн дагуу зохион байгуулна.
- 3.4 Сонгон шалгаруулалттай холбоотой гарсан аливаа гомдол, маргааныг холбогдох хууль тогтоомжийн дагуу шийдвэрлэнэ.